

Poli'a Efesasi Vahe'mokizmi Avonkrezmi'nea Naneke

1 ¹Poli'na, Kraisi Jisasi aposol eri'za ne'mo'na Anumzamo Agra'a avesite huhampri nantenege'na, Efesasi kumate zmentinti nehaza naga'ma (Saints) mani'ne'za, Kraisi Jisasi tamage zamentinti nehu'za amage' nentaza vahetega ama avona kre netroe. ²Anumza Nerafantegati ene Ranti Jisasi Kraisiintegati asunku'zane, rimpa fruzane tamagritega vie.

Kraisimpi mono agampu'zana me'ne

³Anumzamofa ra agi amisune, Ranti Jisasi Kraisi Nefa'ma mona kumapinti Kraisimpi, avamupina maka asomura hurante'ne. ⁴Korapara Agra mopa erifore osu'nea knafi agu'areti avesiranteno, Kraisi'ene otage huta fatgo zampi, havizana omanesigeta Agri avure manisnune huno tagrira huhampriante'ne. ⁵Korapa Agra huhampri tanteno mofavreni'aza hugahaze huno Jisasi Kraisiinteti, tavreno Agrarega tante'ne, Agra'a so'e zanteti antahi ramino ana hu'ne, ⁶Anumzamo, avesinentemofa Jisasi Kraisimpi taza hu'zana eri tagitregeno erami'neazankura, ra agi amisune, ⁷Kraisi koranu tahokeheno miza seneranteno, maka kumitia eri fnane nehuno, tusi'a asunku zama'areti Agra asuragiranteno taza hu'ne, ⁸Agra rama'a zampi tagrira tza hu'ne. Mika fatgo antahintahine, knare tagu tagesa tami'ne. ⁹Korapa Agri'a agu'afi oku'a me'nea antahi'za eriamu huno taveri hu'ne. Kraisi'a zamaza hugahie huno agu'afi atre'nea tzahu'za, Agra'a eriamu hu'ne. ¹⁰Anumzamo ofenka'ati mago knama esia zupa, monane mopane eri mago huno, maka Kraisi kvafi antenaku antahi'neane,

¹¹korapa agafare Anumzamo Agra'a avesite ko antahino keno huteno, maka'zana Kraisiinteti erisanti hare'snaze huno tvarenaku huhampri rante'ne. ¹²Tagra ana nehuta, Jiu vahemota Kraisiinte tamentintima pusante nehumota tagra, Anumzamofona ra agi amigahune. ¹³Tamagranena tamage kema Kraisimpinti ko antahitetma, manivava tamasi mu eri'zanku Knare MusenKe'are tamentinti nehazageno, Agra Ruotge Avamu'anu azanko avona kreno huhampri (seal) tamanteno

tamamine. ¹⁴Avamu'ama tami'neana agu'areti huhampri tanteno neramino, tahokeheno Anumzamo Agrarega tavrente'negu, muse hunenteta ra agi amisune.

**Poli'a, Efesasi kumate vahe knare zamagu zamagesa
Anumzamo zamisigu nunamu hu'nea naneke**

¹⁵E'ina hu'nea agafare nagrahana, Ranti Jisasinte tamagra tamentintima nehza ke'ne, maka Anumzamofa naga otge hu'za nemni'za naga'ma tamavesima nezmantaza zanku nentahi'na, ¹⁶maka zupa nunamuni'afina nagerakani noramante'na, tamagrikura Anumzamofona susu hunentoe. ¹⁷Ana nehugeno Ranti Jisas Kraisi Anumzamo, so'e hihamu'ane msamofa Nfa'amo, knare antahi'zane, tamagu tamagesane, tamage ke'a huama hu antahi'zamofa avamura tamisnigeta Agrira antahita keta nehuta, avamupina ra hugahaze. ¹⁸Nagra nunamu nehuankino antahintahitamofona msa tamina, tamagu'amofa avurgamo hari nehanigetma, Agrama kezatino fore hugahie huno tamagima nehiazana, tamagra kegahaze. Mizama'a mreri'nea zantmi, hihamu'ane msazama'afi Anumzamo'a tamina, Agrite mni ruotge nehaza vahe'mo'zane, tamagra erigahaze. ¹⁹Hanki tagrama tamentinti nehuna vahe'ma agatererfa razama, Agra hanave'a tami'neana, ama ana hihamu'agino, ²⁰tusi'a hihamu'afi Kraisi fri'nefintira, Agra azeri oti'teno monare azantamaga kaziga avare antegeni mani'ne. ²¹Mreri onagate'nea tra'ma kvahu hanavema, hampo'na'ma, makazante kvama hu'neane, mika zamofa agima ko'ma antemi'neane, menima ama mani'nona knafinkerompaga, henkama esia knafi'neane agtereno onaga'a manigahie. ²²Maka'zana Kraisi azampi kva hanie huno ante'ne, Agri kvafi maka'zana mono kevumotagu (sios) huno ante'ne, ²³Agri avufamo'a mono nonkna hu'ne, Kraisi mani viteno nemnino maka zampina anazanke huno mani vite'ne.

Fri' vahekna huta mani'nonkeno Jisasimpi tazeri oti'nea naneke

2 ¹Korapara ke ruhanentagita, kumitmifi fri'nazane. ²Tamagranena maka mopafi vahe'mo'za nehazankna huta havi kante nevzane, kumi'tmimo avite'negeta, Sata kerera amage anteta, kankamumpi nemniza hihamu'ane kva avamutamimofa amage' anteta, Sata erizana enerita Anumzamofonte zamagu'a onte'za zamefi hunemi'za vahe'ene nemanizane. ³Zamagri amu'nompina korapara tagranena anazanke huta maka havi tvesi'zante amage ante'none, tagu'afine amega tavufafine tave'manesiazana hutere nehuta, tagra ana kefozampi fore huta amage' nentonkeno, Anumzamofa asi vazi'zamo tagrite ene maka vahete ene e'ne. ⁴Hu'neanagi Anumzamofa asuragi'zamo vite'ne, na'ankure tusi'a avesi'zanu Agra agu'areti tagrira avesi rante'ne. ⁵Kasege'a ruha'nentagita

fri vahe kna huta mani'nonkeno, asunku'zanteti tahokeno, tagrira fri'zampitira, ⁶Kraisimpi tazeri otino magopi mona kuma'are tantegeta, Agrane kini tra'are mani'none, ⁷ana nehuno henkama fore hania knarera, agtere'nea zana Agri'a mrerisa asunku'zanu tagrira Kraisi Jisasimpi tza huno agampu hurantesie. ⁸Na'ankure tamentinti nehzagu asuntgiramanteno tamaza huno tamavre'ne. Tamagra'a knare'za hu'nanaza zante anara osu'neanki Anumzamo museza (gift) tami'ne. ⁹Eri'za eri'nea mizana omnene, e'igu mago vahe'mo'a, agra'a agi erisaga osugahie. ¹⁰Na'ankure tagrira, Agra'a tro hurante'ne, Kraisi Jisasimpi knare eri'za erisnunku, Anumzamo korapa ana kana retro hunte'neankita, knare eri'za enerita ana kantera vugahune.

Kraisimpi tazeri ksefa hu'nea naneke

¹¹E'i zanku tamagra tamagesa antahiho, korapara tamagra megia vahere huta mani'nazane (Gentiles), tamagima ante'nazana, zamufa tga osu vahere nehu'za, zamufama tga nehaza vahe'mo'za, (Jiu) e'i zamazanu zamufa azeri'ne'za tga nehaze. ¹²Tamagra tamagesa antahi ani hiho, tamagra e'i ana knarera Kraisina afe'are mani'nazane, Israeli vahe krerafane omani'nazane, huvempa huno huhagerafi zamante'nea agu'afina omani'nazane, so'e mani'zama eri kankamu tamia omanegeno, tamagri Anumzana mopafina omani'neane. ¹³Hu'neanagi, menina Kraisi Jisasimpi afete'ma kotetma tamagra mani'nazafintira, Kraisi koramo tamavreno tva'oma'are nermante. ¹⁴Na'ankure Agra'a tarimpa fru huno mni'zana (peace) neramino, Jiu vahe ene megia vahe'mota ha' orente arente nehunana tazeri magopi neranteno, amu'nontifima atane'zama me'neana, eritreho tazeri mago hu'ne. ¹⁵Agra'a avufareti ha' orente arente nehu'nazana eri fnane nehuno, Jiu vahe kasege ramine, osi kasege ramimo megia vahe (Gentiles) tazeri fegi atre'nea kasege ramina eri netreno, Agra'a Jiu vahene megia vahemota tazerino magoke vahe tro huneranteno, ke ha'ma nehuna zana tazeri fru huno mago tarimpa hurante'ne. ¹⁶Rugeka zafare Kraisi'a frino ha' frama tamagra'rmagra hu'zana eritreho, tamazeri mago higetma, Anumzamofona magoke avufagna hu'naze. ¹⁷Agra eno rimpa fruzana afete'ma mani'naza vahera mono ke huzmasmi'ne, hagi tva'onte mani'naza vahera arimpa fru huzmante'ne. ¹⁸Na'ankure Agripinti tarega vahe'mota, magoke Avamu e'nerita, Nerfantera vugahune.

¹⁹E'i zanku tamagra menina megia vahe'mota, emani vahe knara osu'naze. Hianagi tamagra Anumzamofona naga'ene noma'afi nemanize. ²⁰Aposol naga'ene kasnampa naga'mo'za, tra' zafagna hu'naze. Kraisi Jisasi'a Agra nomofona renagentete tra havegna hu'ne. ²¹Agripi ana miko nomofona, vazinte zafamo ome vazinte eme vazinte hiankna huno hagera ra huno, Ramofona otage mono noma'a efore nehie. ²²Tamagra ana

nonkna hutma mani'nazageno, Anumzamo'ene Avamu'amo'a ana nompina mani'ne.

Poli'a megia vahepi mono ke hu'nea naneke

3 ¹Ama'na agafare nagra Poli'na Kraisi Jisasi eri'zampi kina tamagri (Gentiles) tamazahu zantere hu'noe. ²Anumzamo asunku hurmanteno tamagritega naneke'ama huamahu eri'zama nami'neana tamagra ko antahinegahaze. ³Anumzamo, oku'a me'nea antahi'zama'eria huna naverige'na, nagra osi'a naneke kote'na avompina kre'noe. ⁴Kegahazema hu'na kre'noa avoma hamprisuta antahi'zaniafi oku'a me'nea antahi'zama Kraisinku'ma hu'noa kea tamagra antahi'ama hugahaze. ⁵E'i ana antahi'zana korapa vahe'moza eriana hige'za antahi'nazane. Hagi menina Agra'a aposol vahete ene kasnampa vahete Avamu'mo eriana nehie. ⁶Ama'i oku'a antahintahigino, megia vahe'mo'za (Gentiles) Jiu vahe'ene mago'zanke hu'za marerisa knare'zana, Anumzamofu mofavre ramine erigahaze. Ana tare kevumo'za knare muse nanekere zamentinti nehu'za, magoke avufa nemani'za, huhampri zamante'nea asomura Kraisi Jisasi'pinti muse huza erigahaze.

⁷Ama Knare Musenkemofu (Gutnius) eri'za vahe nagra mani'noe, Anumzamo asunku hunanteno muse'za hanavea nami'nea hanave'afi eri'zana e'nerue. ⁸Nagra mago'a mono eri'za (saints) vahepina, osi'tfa hu'nogeno asunku hunanteno, urefa erefa'a omne naneke megia vahepi huama huo huna namige'na, Kraisimpi knare'za me'neaza eriana hu'na neramasmue. ⁹Nagrira Anumzamo maka'zama tro'ma hu'nea Ne'mo, oku'a ama naneke korapa ante'nea nanekea huhampri nantege'na, ama nanekea hakare'a vahete eriana nehue. ¹⁰E'ina hu'neankino Anumzamofu ruzahu ruzahu knare antahi'zana mono vahe'mo'za eriana hu'naze. Mona kumate kegva nehaza vahe'ene, manisga hu'naza kva vahe'mo'za kegahaze. ¹¹Ama'i korapa monane, mopane tro osu'nenno, tro huntogeno me'nea antahintahi Kraisi Jisasi Rantimofompi eri'ama hu'ne. ¹²Na'ankure Kraisi'nte tagra tamentinti nehunku, koro osuta Anumzamofu tvaonte nevune. ¹³E'ina hianagi nagri'ma tusi'a zampi nazeri haviza nehza zankura tamarimpa havizana osiho, e'ima nazeri haviza nehza zamo'a tamagri tamaza hanigeta knare hutma manigahaze.

Poli'a mani hanavetisagu nunamu hu'nea naneke

¹⁴Ama ana agafare, Nerfante narena re'na nunamuna nehue, ¹⁵hakare monafi naga'ene, mopafi naga'mo'za Agripinti zamagia e'nerize. ¹⁶Nagra nunamu nehue, Agra'a m'rerisa knare'za huhampri tamanteno hanave'afi tamazeri hampo'na hanigu, Agra'a Avamu vahe'mofu agu'afinka ante'ne. ¹⁷E'ina hanageno, tamentinti nehzagu Kraisi'a tamagu'afi mani'nesigetma, tamagra mopafi zafamo rafu'na reno oti hanave tiankna huta Anumzane,

tamararuhe'i kizmia tmagu'areti zmavesi zmantegahaze. ¹⁸Ana nehutma maka Anumzamofa naga'mo'za (saints) nentahizankna hutma kagatahu'ane, zaza'ane, atrure'ane, zaza huno fenka urami'nea avesizana kegahaze. ¹⁹Ana nehutma Kraisi agu'areti avesima rante'nea zamo'a antahi'zana agtere'neakitma ketma antahitma nehutma, tusi'a zantfa me'neankitma ana mikora antahi amara osugahaze. E'ina hanigetma tamagra knare mani'zane hanavene Anumzamofontegati avi'mateno nezazana kegahaze.

²⁰Menina Agri'ma antahima negona zampina agtereno mevite'neakino, tagu tagesama nentahunazana agtereno amne anazana hugahie. Agri hanavemo tagu'afi eri'za e'nerie, ²¹Ana hanigeno maka mono vahe'mo'za, Kraisi Jisasimpi, Anumzamofa agi'a erisga huvava hugahaze. Tamage.

Kraisi ene hagerafita manisuna naneke

4 ¹E'ina hu'negu nagra Ramofa kina vahe'mo'na, knare hutma mani'zantamifi kana nevutma, tamagima higetma eri'naza zanku hampo'nati'na tamavumro nentoe. ²Tamavufga anteramitma, agazone hutma ru vahe'ene nemnitma, ke hakare osutma fru hutma, vahe'mofa antahizamitma zamesi zamantegahaze. ³Hakare zupa hanavetima Avamu'ene tragotetma nemanitma, hamprima tamanteno anaki'ma tamante'nea fruzana erigahaze. ⁴Tagra mika'mota magoke avufane, magoke Avamu me'neankino, e'ima tagi hu'neana magoke Anumzamofa naga fore hanunku tagi hu'ne. ⁵Magoke Rantia manino, magoke tamentintimeno, magoke mono ti nefrone. ⁶Anumza Nerfa'a maka'mota magoke mani'nenokva huneranteno, maka'za kva nehuno maka'zampina mani'ne. ⁷Hu'neanagi magoke magoke'mota asunku'zana ruzahu ruzahu muse'za Kraisi'a tami'ne. ⁸E'ina hu'negu avon tafepina anage hu'ne, ***Agra anagamu mrenerino'a, Agra vugota huno kina vahe zamareno vu'ne. Agra'a vahera muse'za zami'ne.*** (Sam-Zga 68:18) ⁹Menina anage nehzankea me'ne, anagamu mareri'ne, ana kemofona nankna agu'agesa me'ne, Agra anazanke huno mopa agu'afi urami'neana? ¹⁰Agra urami'nemo otino mrerino maka mona agtereno afete mani'neankino, Agra hakare zampina mani avitegahie. ¹¹Mago'a nagara Agra aposol eri'za nezmino, mago'a nagara kasnampa eri'za nezmino, mago'a nagara mono ke huamahu eri'za nezmino, mago'a nagara mono kevu kegva kri eriza nezmino, mago'a nagara rempi huzmi eriza zami'ne. ¹²Eri'za erisaza'zama, naga'amokizmi (Saints) zami'neana, non kiazana hu'za Kraisi avufa eri ra hugahaze, ¹³ana nehuta Anumzamofa Mofavre'are tamentintifina eri mago huta keta antahita nehuta, hanave enerita Ramofonte nena vahetfa nemnita, Kraisi avu'avapina aviteta Agri kna huta maniho. ¹⁴Ana agafare tagra osi mofavregna huta omni'nunkeno, hagerimo erikranto kranto hiankna tamentintifina osnie. Na'ankure mago'amo'za ruzahu ke hunerasmi'za, ananke havige hu'za

eri tamage keguna ke nerasmize. ¹⁵Hianagi tamage ke nehuta, tagu'areti zamesi nezmanteta, hageta nena nehanunkeno maka'zamofona Kraisi aseni'a manigahie. ¹⁶Agripi miko avufamo omoni, emeni huno azeri hanavetisigeno, magoke magoke avufamo'a ruzahu ruzahu eri'za e'nerino, miko avufamo'a ra huno knare avesizampi hagegahie.

Ruotge huta manisuna naneke

¹⁷Ramofu hanave'afi anage hu'na neramasamue, mono nontahiza vahe knara (Gentiles) osiho, zamagra hzanegre'za mago'zana zamagu'areti hugara osu'naze. ¹⁸Antahi'za zamifina hani hige'za, Anumzamofu mani'zampintira atre'za megia nemanize, na'ankure zamagra antahi'za ke'za nosazageno, zamagu'amo'a hanveti'ne. ¹⁹Ana nehu'za zamagra havizane knare'zane ke'va nosu'za, zamesi'zamofu ke'fo avu'ava zampi nevazageno, zamagri mani'zampina maka havizamofu avesizamo avite'ne. ²⁰Hu'neanagi tamagra, e'inhau zampintira Kraisisa rempi huta ontahi'naze. ²¹Tamagrama ko Agriku'ma nentahizageno Agripima rempi hurami'nea zana, Jisasimpi tamage nanekea me'ne. ²²Korapa ama mopafi kasri avu'avaza mani'zantamifi me'neane, maka havi tamagu tamagesa me'neane, havige avu'ava'zanena atreho. ²³Ana nehuta antahintahifine, avamupi ksefa huta manigahaze. ²⁴Ksefa vahe tro huta nemanita, Anumzankna huta fatgo avu'ava zampi ruotage huta tamage ke'afi manigahaze.

²⁵E'ina hu'negu magoke magoke'motma havige osutma tamage hiho. Mago avufagna hutma mono kevu mani'nonanki, tva'ontamire ru vahe'ma mani'nesiana havigea huonteho. ²⁶Tamarimpa hegahianagi, ana zampina kumira osiho, tamarimpa hesuta zaza kna omanita ko eri so'e hutkeno zge'a ufreno. ²⁷Hankromofona (Satana) mago kankmuna tamagra omiho. ²⁸Musufa ne'ma mani nesuno'a musufa oseno. Hianagi agra azampinti eri'za erino knare'zana erifore nehuno, zamagrazmi zamaza huga osu'nesaza nagara zamaza hugahie. ²⁹Hanki tamagipintira vahe'mokizmia havi nanekeke urinke'nena ozmasmitma, zamaza nehutma, hanaveti'za manisaza nanekege nehnageno, antahisamokizmi'a zamaza hugahie. ³⁰Anumzamofu Avamura mani'zantamifina rimpagna eriomihio. Tmagesa antahiho, Avamu'mo agra azanko avoma'a kreno tamagra nagri nagare hu'neankino, esnia knarera tamaza huno tamavregahie. ³¹Rimpa hevava hu'zane, maka rimpa haviza huno ha' hu'zane, rimpa he'zane, rankege hu'zane, vahe zamefi'a ke hu'zana netretma, maka vahe kna zami'zana atreho. ³²Agazone hutma vaheku tamasuntgi nezmantetma, Kraisiimpi kumitia Anumzamo eri atre'rante'neankna hutma, kumi'zmia atre'zmanteho.

Avesizampi manisnaza naneke

5 ¹E'ina hu'negu Anumzamo nehia avu'avakna hutma tamavutnavara hiho, nankure tamagrira agu'areti avesi nermantea mofavre'a

mani'naze, ² tamagra vaheku tamavesi nezmanteta, Kraisi'ma agu'areti avesiranteno agra'a avufga atreno tazama hu'neakna nehutma, Agra'a avufa tagriteku huno Anumzamofontega mananentake'za kre sramna vu'neakna hiho.

³ Hianagi monko'zano, kefo avu'avazano, agraguke avemasi'zana tamagripina omne tfaza hino, Anumzamofu otage nagapina (saints) e'inahu zana amu'no zamifina omnegahie. ⁴ Kefo'zamofu naneke osutma, vahe agze ami nanekene, zokago vakago nanekea ana maka netretma Anumzamofu muse huntaho. ⁵ Na'ankure tamagra antahi ankere'naze, monko'za nehza vahe'ene, kefo avu'ava nehaza vahe'ene, vahe'zante kezmasane nehaza vahe'ene, havi anumzante mono hunentaza vahe'mo'za, Kraisine, Anumzamofu kumara e'origahaze.

Anumzamofu msazama'afi manisnuna naneke

⁶ Atrenkeno mago nemo'a avufa'a omne keretira reramatga osino, na'ankure e'i ana zamo Anumzamofu rimpa he'zana erino kema nontahiza vahetera ne-e. ⁷ E'i zanku ana vahe'enena tragotetma omaniho. ⁸ Na'ankure korapara hanizampi mani'nazane, hianagi menina Ramofu Msafi mofavre'aza hutma, ana msafi vano hutma maniho. ⁹ Na'ankure msazamofu raga'a, knare'zama hu'zane, fatgozama hu'zane, tamage kema hu'za fore nehie. ¹⁰ Mraguzatitma Rantamimofu avema nesiaza rempi hiho. ¹¹ Rga'a reonteno hani avu'ava zantera tragora otetma, ke huta eriana hiho, ¹² na'ankure asane osuga'zanku vahe'mokizmi zamagesafina havizama oku'a nehaza zankura tagaze hugahianki hutma antahitma osiho. ¹³ Hianagi msamo remsa maka zantmina higeno'a, oku'a me'nea kefo zantmimo'a amate efore nehie. ¹⁴ Na'ankure hakarezama tvi'mo'ma eri ama nehigeno, e'i ana agafare amanage hu'ne, ***kavu'ma mse'namoka kavunaso, fri'pintira otio, Ana hanankeno Kraisi'a remsa hugantegahie.*** (Ais 26:19)

¹⁵ E'i zanku kama vano hananana kva huo, antahi'za omne vahe knara osunka, antahi'za me'nea vahe kna huo, ¹⁶ kazigzi hutma maka knafina knare eri'za e'neritma maniho, na'ankure menina kefozamo hakare hu'neanknafi nemanune. ¹⁷ E'i zanku tamagra negi vahe knara osutma, Rantimofu avesizama hanaza zankuke tamagesa antahiho. ¹⁸ Waini tina netma negia oneho, na'ankure anazamo tamazeri haviza hugahie. Hianagi atrenkeno Avamu'mo tamagu'afina avitena, ¹⁹ atruma nehanutma, Deviti zgame ene (Sams), mono zgame'ene, avamu'mofu zgame nehutma, Rantmimofona tamagu'areti musena hunenteta, ²⁰ hakare zupa maka zampina Ranti Jisas Kraisi agifi, Anumza Nafatimofona musena huntaho.

Aravemokizmi naneke

²¹ Kraisina antahi'nemitma rumokizmia ovesinte avesinte hiho.

²² Anemotma, Ramofu agorga nemniza kna huta tamavenanehe'i agorga

maniho. ²³Na'ankure vemo'a, a'mofona aseni'a mani'ne. Kraisi'a anahu kna huno mono kevumofa aseni'a mani'ne. Agra ana mono kevu mofo avufa'a mani'nenozo aza huno avare'ne. ²⁴Hianagi mono kevumo'za Kraisi kvafi nemnizankna hu'za, a'nemo'za nezmave kvafi maka'zana anazanke hu'za hugahaze. ²⁵Vene'nemotma, a'ne tmia tamagu'areti zmavesi zamanteho, Kraisi'ma mono kevu'agu agu'areti avesi zamanteno zamahoke heno ana a'ku (sios) fri'nea kna hiho. ²⁶Ana nehuno Agra'a mono naga'mofona zamazeri ruotge huzmanteno tinuti sese hiankna huno ke'anuzi sese huzmante'ne. ²⁷Anama hu'neana zamavreno Agrarega zamantesige'za, ana mono kevumo'za msazampima pehena omneno, kasmu' oneno, avufa ohakne: otage hu'za fatgo zampi hazenke omnenke'za manisnazegu ana hu'ne. ²⁸Hagi anazanke hu'za vene'nemo'za a'ne zamia, zamagra zamufagu zamavema nesia kna hu'za zmavesi zamanteho. Aza'o nenaronku avesima nentemo'a, agra'agu avesinente. ²⁹Na'ankure maka vahe'mo'za zamagra zamufagura zamagora note, hianagi zamagra zamufagu avesinte'za ne'za nemi'za, kegva hazankna huno Kraisi'a mono' kevu'are kegva nehie. ³⁰Na'ankure tagra Agri mago avufa mani'nene. ³¹E'i ana agafare **Vemo'a nefane, nererane znatreno, nenaro'ene eri hagerafige'ne, tarega'mokea magoke znavufaza hugaha'e. (Anumzamofa avon tafepi amanage huno krente'ne).** (Jen-Agf 2:24)

³²Amama oku'a me'nea antahi'zamo'a, razantfa se'ne, hu'neanagi nagrama nehuaana Kraisinku ene, mono kevu'agu nehue. ³³Anahuga hianagi, amu'nontamifina mago mago'mo'a nenaronkura avesi nenteno agra avufagu agha nentahiankna nehnigeno, nenaro'a anazanke huno nevena antahi nemino ke'a erizafa hugahie.

Famo'ene tramemofa naneke

6 ¹Mofavremotma, tamarera tamafa ke antahizmita amage anteho, tamagra Rantimofa suza mani'naze, e'inahu'ma hanageno'a knare hugahie. ²Pusa kasege'ne, huvempa ke'ne agu'afina me'negu, Neramrerane neramafa ke antahitma amage anteho.

³E'inama hanutma knare hugahaze, ana nehutma za'za kna'a ama mopafina manigahaze. (Ekso-Uti 20:12) ⁴Zamafaheta mofavre nagatmia zamarimpa eri haviza osiho, hanki zamazeri fatgo nehutma zamavumro nezmantetma, Ramo'ma hu'neankante antetma huzmasmiho.

Kazokzo eri'za vahe'ene kva vahe'zmimofa naneke

⁵Kazokzo eri'za vahe'motma, tamagra kva tamima mani'nesimofonku kore hunentetma tamahirahi neresigeta kezimia amage anteta, tamagu'areti kazigzi huta, Kraisi eri'za enerizankna huta eriho. ⁶Mopafi kva vahe'tmimo nermagesageta eri'zana erisunke'za muse hnaze osiho. Hianagi Kraisi kazokzo

eri'za vahe nesampreta, tamagu'areti Anumzamofu avemanesia zanke hugahaze. ⁷Mopafi vahe'mokizmi eri'zana e'norizanki, so'e tamarimpareti Ramofu eri'zana eriho. ⁸Antahiankero, mago'mo'ma knare eri'zama enerisuno'a, e'i ana knare eri'zamofu nona'a Ramofonteti mizana erigahie. Kazokzo eri'za ne'mopi amne ne'mopi mago'zahu zanke huke mizana erigaha'e.

⁹Hanki kva vahe'motma, eri'za vahe'tmia mago'zahu tamavutma hunezmantetma, zamazeri korera osiho, monafi nemnia kva ne'mo tarega'motma kva mani'ne, hankino Agra mago'mofona azeri knare nehuno, mago'mofona azeri havizana osugahie.

Sondia vahe kna huta Avamupi manisuna naneke

¹⁰Hanki vgare nanekema tamasmisuana, Ramofonte hanavetitma Agri hihamu'mofu hanavefi manigahaze. ¹¹Maka Anumzamofu ha' kukena eri hankreho, ana nehutma Sata'ma reraamatgama hania zampina oti hanavetitma manigahaze. ¹²Na'ankure tagra mopafi vahe'enea hara nosune, hagi mopafi kva hu'naza vahe'ene, hihamune havi avamutamine, mopafi hanizamofu kva hu'naza ha' vahe'ene, mona kankamumpi kefozamofu ha' avamu'ene hara nehune. ¹³E'i zanku maka Anumzamofu ha' kukena hiho, ana hu'netma havi knafine ana maka'zama hanafina oti hanave tighahaze. ¹⁴E'i zanku oti hanavenetita, tamage kereti tamu nofira nehutma, fatgo avu'ava'zana tamahihizarera hanko antea kna hiho. ¹⁵Knare musenkefinti e'nea rimpa fru kea, tamagia ano antea kna nehuta, hanavetita otigahaze. ¹⁶Maka zampina, tamentintimo'a hanko tamigna hu'nena, Sata'ma teve taginteno'ma tamagritega ahetsisigeno esnia kevea resu hugahie. ¹⁷Anumzamo tamagu vazino tamazahu'nea antahintahia, fetori kna hutma antegahaze. Avamu'mofu kazinknona Anumzamofu naneke eneritma, ¹⁸maka zupa nunamu huvava nehutma, nunamuna hutma antahigeho, ana nehanutma tamagra kva hu'netma kazigzi hutma maka eri'za vahakura (kristen) nunamu hutma Anumzamofona antahigeho. ¹⁹Ana nehutma nagriku nunamu hutma antahigenkeno, nagira erioza hanige'na korera osu'na hanavetina oku'a me'nea naneke huama hu'na knare musenkea zamasm'nenno. ²⁰Na'ankure nagri'ma nazeri oti'nege'na, Agri agi eri'na seni nofite kina hu'na mani'nena, ana nanekema hanufina nagra hanaveti'na mni'nena huama ha'nenno.

Huvgare naneke

²¹Hu'neanagi, nagrama mani'noa zamofona, Tikikusima tavesinentona nerafu'ma, Rantimofu eri'za ne'mo maka nanekea tamasmisigeta tamagra antahigahaze. ²²Nagra anazanku hu'na huntogeno tamagritega neviankitma tagenke'a nentahisageno tamagu'a tamazeri hanavetigahie.

²³Tafuhetane, tasareheta tamamentinti nehutma ovesinte avesintema nehaza naga'motma, Anumza Nerafanteti'ene, Ranti Jisas Kraisine rimpa fruzamo'a tamagrane mesie. ²⁴Asunku zamo'a Ranti Jisas Kraisinku avesin nentaza vahepi me'nenkeno, avesi'ma nentaza zamo'a vga oregahie. Tamage.